

PRESTASI PERDAGANGAN MALAYSIA, JULAI 2022

Jumlah perdagangan Malaysia mengekalkan pertumbuhan dua angka pada Julai 2022, berkembang 39.8 peratus, mencecah RM252.6 bilion berbanding RM180.7 bilion pada tahun sebelumnya. Eksport meningkat 38.0 peratus kepada RM134.1 bilion pada Julai 2022. Import bernilai RM118.6 bilion meningkat 41.9 peratus tahun ke tahun. Imbangan dagangan terus mencatat lebihan, dengan nilai RM15.5 bilion, meningkat 14.3 peratus berbanding tahun sebelumnya.

Berbanding Jun 2022, jumlah perdagangan, eksport, import dan imbangan dagangan masing-masing menurun 6.5 peratus, 8.2 peratus, 4.5 peratus dan 29.1 peratus.

Bagi tempoh Januari hingga Julai 2022, jumlah dagangan, eksport, import dan lebihan dagangan mengekalkan pertumbuhan positif. Jumlah dagangan meningkat 29.9 peratus, disokong oleh peningkatan eksport (+27.8%) dan import (+32.5%). Pada masa yang sama, lebihan dagangan meningkat 7.4 peratus.


A. EKSPORT

Eksport Mengekalkan Pertumbuhan Dua Angka, Melonjak 38.0 peratus pada Julai 2022


1. Prestasi Eksport

Eksport Malaysia mencatatkan RM134.1 bilion, meningkat 38.0 peratus berbanding Julai 2021. Peningkatan ini didorong oleh kedua-dua eksport domestik dan eksport semula. Eksport domestik berjumlah RM102.1 bilion, menyumbang 76.2 peratus kepada jumlah eksport, meningkat 33.4 peratus. Di samping itu, eksport semula bernilai RM32.0 bilion, menokok 55.1 peratus tahun ke tahun. Sementara itu, perbandingan secara bulanan, eksport menyusut 8.2 peratus atau RM12.0 bilion. Analisis terma pelarasan musim bulan ke bulan, eksport menurun 12.4 peratus atau RM18.5 bilion kepada RM134.1 bilion.

Carta 1 Eksport Domestik, Eksport Semula (RM bilion) dan Perubahan Tahunan (%)



Carta 2 Nilai Eksport Asal dan Nilai Eksport Pelarasan Musim, RM bilion



2. Prestasi Eksport mengikut Negara Destinasi Utama


Singapura dan China adalah negara destinasi utama pada Julai 2022 dengan jumlah sumbangan 28.4 peratus kepada jumlah eksport Malaysia.

Eksport ke Singapura berjumlah RM22.2 bilion, mewakili 16.5 peratus daripada jumlah eksport, mencatatkan peningkatan 57.1 peratus atau RM8.1 bilion tahun ke tahun. Peningkatan ini didorong oleh eksport yang lebih tinggi barangan elektrik & elektronik (+RM3.2 bilion, +50.0%); keluaran petroleum (+RM2.3 bilion, +80.1%); dan jentera, peralatan & kelengkapan (+RM607.3 juta, +67.7%).

China merupakan negara destinasi kedua tertinggi pada Julai 2022 dengan jumlah RM15.9 bilion dan menyumbang 11.8 peratus kepada jumlah eksport Malaysia, meningkat 9.8 peratus atau RM1.4 bilion tahun ke tahun. Peningkatan ini dipacu oleh eksport yang lebih tinggi barangan elektrik & elektronik (+RM1.4 bilion, +29.7%) dan gas asli cecair (+RM793.6 juta, +102.6%).

Eksport hampir kesemua negara destinasi utama meningkat dua angka kecuali ke China yang meningkat 9.8 peratus.

Carta 3 Perubahan Tahunan Eksport mengikut Negara Utama, Julai 2021 dan Julai 2022




3. Eksport ke Negara-negara ASEAN

Eksport ke negara ASEAN yang meliputi 31.7 peratus daripada jumlah eksport Malaysia mencatatkan nilai RM42.5 bilion dengan pertumbuhan 55.6 peratus. Kenaikan ini disumbangkan terutamanya oleh barangan elektrik & elektronik yang meningkat 41.4 peratus atau RM4.1 bilion, diikuti keluaran petroleum (+RM4.1 bilion, +76.6%); jentera, peralatan & kelengkapan (+RM1.1 bilion, +76.7%), peroleum mentah (+RM769.6 juta, +155.2%); produk besi dan keluli (+RM726.4 juta, +178.6%); dan gas asli cecair (+RM632.5 juta, +346.0%).

Singapura menyumbang 52.1 peratus kepada keseluruhan eksport negara ASEAN, berkembang 57.1 peratus berbanding tahun sebelumnya.

Carta 4 Pembahagian Peratusan Eksport, Julai 2022




4. Prestasi Eksport mengikut Sektor Ekonomi

Eksport barangan perkilangan meningkat 35.4 peratus atau RM29.4 bilion pada Julai 2022 dan meliputi 83.7 peratus daripada jumlah eksport. Barangan elektrik & elektronik merupakan penyumbang utama kepada pertumbuhan (+RM12.2 bilion, +35.2%), diikuti keluaran petroleum (+RM8.4 bilion, +80.3%); jentera, peralatan & kelengkapan (+RM2.0 bilion, +56.9%) barangan perkilangan logam (+RM1.4 bilion, +35.7%); peralatan optik & saintifik (+RM1.4 bilion, +36.3%); kimia & bahan kimia (+RM1.0 bilion, +19.1%); dan barangan perkilangan berasaskan minyak kelapa sawit (+RM807.6 juta, +27.0%).

Sementara itu, eksport hasil perlombongan yang mewakili 8.1 peratus daripada jumlah eksport mencatatkan pertumbuhan 100.4 peratus kepada RM10.8 bilion. Pertumbuhan ini didorong oleh eksport yang lebih tinggi gas asli cecair (+RM2.7 bilion, +82.0%); petroleum mentah (+RM1.1 bilion, +74.0%) dan bijih logam & serpihan logam (+RM948.4 juta, +314.2%).

Eksport keluaran pertanian mencatatkan pertumbuhan 24.1 peratus atau RM2.0 bilion menyumbang 7.8 peratus pada Julai 2022. Peningkatan ini sejajar dengan kenaikan dalam eksport minyak kelapa sawit & hasil pertanian berasaskan minyak kelapa sawit, meningkat 26.2 peratus daripada RM6.7 bilion kepada RM8.5 bilion. Selain itu, prestasi ini turut dirangsang oleh kayu gergaji & kayu kumai (+RM94.9 juta, +48.6%); getah asli (+RM66.6 juta, +18.9%); dan makanan laut, segar, sejuk atau beku (+RM26.9 juta, +14.2%).

Paparan 1 Eksport mengikut Sektor, Julai 2021 dan Julai 2022



5. Eksport mengikut Produk Utama Terpilih

Peningkatan kukuh eksport pada Julai 2022 adalah dipengaruhi oleh pertumbuhan positif produk berikut berbanding Julai 2021:

- Barangan elektrik & elektronik (35.0% daripada jumlah eksport), berkembang 35.2 peratus (+RM12.2 bilion) kepada RM47.0 bilion;
- Keluaran petroleum bertapis, yang menyumbang 13.3 peratus kepada jumlah eksport, melonjak RM8.1 bilion atau 83.6 peratus kepada RM17.9 bilion sejajar dengan peningkatan dalam nilai purata seunit (+65.7%) dan volum eksport (+10.8%);
- Gas asli cecair, mencakupi 4.5 peratus daripada jumlah eksport, meningkat RM2.7 bilion atau 82.0 peratus selaras dengan pertumbuhan nilai purata seunit (+63.2%) dan volum eksport (+11.5%);
- Minyak kelapa sawit & hasil keluaran berasaskan minyak kelapa sawit (9.1% daripada jumlah eksport) meningkat RM2.6 bilion (+26.5%) kepada RM12.3 bilion. Eksport minyak sawit, komoditi utama dalam kumpulan produk ini meningkat RM1.8 bilion atau 31.6 peratus seiring dengan kenaikan nilai purata seunit (+56.4%). Sebaliknya, volum eksport jatuh 15.9 peratus;
- Petroleum mentah, meliputi 1.9 peratus daripada jumlah eksport, naik RM1.1 bilion atau 74.0 peratus kepada RM2.5 bilion selaras dengan peningkatan nilai purata seunit (+81.6%). Sementara itu, volum eksport mencatatkan pertumbuhan negatif 4.2 peratus;
- Kayu & hasil keluaran kayu yang menyumbang 1.5 peratus kepada jumlah eksport meningkat 58.1 peratus atau RM760.9 juta kepada RM2.1 bilion; dan
- Getah asli (0.3% daripada jumlah eksport) berkembang RM66.6 juta atau 19.0 peratus selari dengan peningkatan dalam volum eksport (+10.5%) dan nilai purata seunit (+7.6%).

Paparan 2 Eksport mengikut Produk Utama Terpilih, Julai 2021 dan Julai 2022

Sumbangan	35.0%	13.3%	9.1%	4.5%	1.9%	1.5%	0.3%
							
	Barangan Elektrik & Elektronik	Keluaran Petroleum Bertapis	Minyak Kelapa Sawit & Hasil Keluaran Berasaskan Minyak Kelapa Sawit	Gas Asli Cecair	Petroleum Mentah	Kayu dan Hasil Keluaran Kayu	Getah Asli
	RM bilion	RM bilion	RM bilion	RM bilion	RM bilion	RM bilion	RM bilion
Julai 2022	47.0	17.9	12.3	6.1	2.5	2.1	0.4
Julai 2021	34.7	9.7	9.7	3.3	1.5	1.3	0.4
	y-o-y (%)	y-o-y (%)	y-o-y (%)	y-o-y (%)	y-o-y (%)	y-o-y (%)	y-o-y (%)
Julai 2022	+35.2	+83.6	+26.5	+82.0	+74.0	+58.1	+19.0
Julai 2021	-12.1	+96.3	+51.1	+76.4	-26.0	+39.2	+42.0

B. IMPORT


Import terus meningkat 41.9 peratus kepada RM118.6 bilion pada Julai 2022

1. Prestasi Import


Pertumbuhan import terus mengatasi eksport pada Julai 2022, meningkat 41.9 peratus atau RM35.0 bilion kepada RM118.6 bilion. Perbandingan bulanan, import menurun 4.5 peratus atau RM5.6 bilion. Analisis terma pelarasan musim bulan ke bulan, import menurun 10.0 peratus kepada RM118.6 bilion.

Berdasarkan tahun ke tahun, import mengikut penggunaan akhir mencatat peningkatan positif dengan kenaikan barangan perantaraan (+32.2%), barangan modal (+29.6%) dan barangan penggunaan (+33.2%).

Carta 5 Import, Nilai (RM bilion) dan Perubahan Tahunan (%)



Carta 6 Nilai Import Asal dan Nilai Import Pelarasan Musim, RM bilion



2. Prestasi Import mengikut Negara Asal Utama


China dan Singapura kekal sebagai dua negara asal utama bagi import Malaysia pada Julai 2022, dengan jumlah sumbangan 32.9 peratus kepada jumlah import.

Import dari China yang mewakili 20.8 peratus daripada import Malaysia, berkembang 26.4 peratus mencecah RM24.7 bilion. Pertumbuhan ini dirangsang oleh barangan elektrik & elektronik yang meningkat 24.2 peratus atau RM1.8 bilion, keluaran petroleum (+RM715.6 juta, +59.4%), kimia & bahan kimia (+RM698.8 juta, +35.5%) dan jentera, kelengkapan & peralatan (+RM543.8 juta, +24.5%).

Import dari Singapura bernilai RM14.4 bilion, menyumbang 12.1 peratus kepada import Malaysia, meningkat 109.3 peratus atau RM7.5 bilion tahun ke tahun. Pertumbuhan ini disumbangkan oleh import yang lebih tinggi bagi keluaran petroleum (+RM5.0 bilion, +230.6%) dan barangan elektrik & elektronik (+RM1.3 bilion, +63.2%).

Import daripada hampir kesemua negara asal utama menunjukkan lonjakan pada Julai 2022, kecuali Kesatuan Eropah yang merekodkan pertumbuhan 6.0 peratus.

Carta 7 Perubahan Tahunan Import mengikut Negara Asal Utama, Julai 2021 dan Julai 2022




3. Import dari Negara-negara ASEAN

Import daripada negara ASEAN terus meningkat dengan pertumbuhan dua angka 74.4 peratus pada Julai 2022 kepada RM30.8 bilion. Nilai ini meliputi 26.0 peratus daripada import Malaysia. Pertumbuhan ini disumbangkan terutamanya oleh peningkatan import keluaran petroleum (+RM5.9 bilion, +222.1%); barangan elektrik & elektronik (+RM1.8 bilion, +41.8%); jentera, kelengkapan & peralatan (+RM575.3 juta, +77.2%); barangan perkilangan berasaskan minyak kelapa sawit (+RM559.8 juta, +95.9%); dan kimia & bahan kimia (+RM554.7 juta, +39.9%).

Di antara negara ASEAN, 46.6 peratus import Malaysia adalah daripada Singapura, berkembang 109.3 peratus atau RM7.5 bilion berbanding tahun sebelumnya.

Carta 8 Pembahagian Sumbangan Import, Julai 2022



4. Prestasi Import mengikut Sektor Ekonomi


Pengembangan import disumbangkan oleh import yang lebih tinggi bagi semua sektor utama pada Julai 2022.

Barangan perkilangan yang merangkumi 82.1 peratus daripada jumlah import, meningkat 38.6 peratus daripada RM70.3 bilion kepada RM97.4 bilion tahun ke tahun. Prestasi ini disokong oleh import yang tinggi keluaran petroleum (+RM8.6 bilion, +108.0%); barangan elektrik & elektronik (+RM7.6 bilion, +29.0%); peralatan pengangkutan (+RM2.4 bilion, +85.7%); kimia & bahan kimia (+RM2.1 bilion, +26.5%); jentera, kelengkapan & peralatan (+RM1.6 bilion, +26.7%) dan barangan perkilangan logam (+RM1.5 bilion, +35.9%).

Import hasil perlombongan berjumlah RM12.4 bilion, meningkat 67.6 peratus berbanding tahun sebelumnya dan seterusnya mencakupi 10.5 peratus daripada import Malaysia. Peningkatan ini disokong oleh kenaikan import petroleum mentah (+RM2.5 bilion, +105.8%) dan gas asli cecair (+RM830.0 juta, +741.8%).

Import keluaran pertanian (5.2% daripada jumlah import) berkembang 23.6 peratus atau RM1.2 bilion tahun ke tahun kepada RM6.2 bilion, dipacu oleh peningkatan import minyak kelapa sawit & hasil pertanian berasaskan minyak kelapa sawit (+RM445.0 juta, +60.7%); minyak sayuran lain (+RM183.3 juta, +39.1%); dan makanan laut, segar, sejuk atau beku (+RM156.7 juta, +64.9%).

Paparan 3 Import mengikut Sektor, Julai 2021 dan Julai 2022



5. Import mengikut Klasifikasi Penggunaan Akhir & Kategori Ekonomi Umum (BEC)

Jumlah import pada Julai 2022 bernilai RM118.6 bilion, meningkat 41.9 peratus tahun ke tahun. Tiga kategori utama import mengikut Penggunaan Akhir yang merangkumi 68.6 peratus daripada jumlah import adalah:

Barangan perantaraan, bernilai RM61.8 bilion atau 52.1 peratus daripada jumlah import, meningkat 32.2 peratus didorong oleh kenaikan import bekalan industri, diproses (+RM6.8 bilion, +38.2%); bahan api & pelincir, utama (+RM5.3 bilion, +145.8%); alat ganti & aksesori barangan modal (kecuali peralatan pengangkutan) (+RM2.7 bilion, +19.1%); dan alat ganti & aksesori untuk alat kelengkapan pengangkutan (+RM1.3 bilion, +62.2%);

Barangan modal, berjumlah RM11.0 bilion (9.3% daripada jumlah import) naik 29.6 peratus, disumbangkan oleh peningkatan import kelengkapan pengangkutan, perindustrian (+RM2.0 bilion, +935.7%); dan barangan modal (kecuali peralatan pengangkutan) (+RM508.3 juta, +6.2%); dan

Barangan penggunaan, berjumlah RM8.5 bilion (7.2% daripada jumlah import), mencatatkan pertumbuhan 33.2 peratus, disebabkan oleh import yang lebih tinggi makanan & minuman, diproses, khusus untuk penggunaan isi rumah (+RM739.8 juta, +39.0%); barangan separa tahan lama (+RM515.3 juta, +50.5%); dan barangan tidak tahan lama (+RM341.1 juta, +20.1%).

C. EKSPORT DAN IMPORT MENGIKUT LOKASI

Eksport pada bulan Julai 2022 meningkat sebanyak RM36.9 bilion (+38.0%) berbanding bulan yang sama tahun sebelumnya. Eksport lebih tinggi direkodkan bagi kebanyakan negeri iaitu Johor (+RM9.3 bilion), Selangor (+RM9.1 bilion), Pulau Pinang (+RM7.6 bilion), W.P. Kuala Lumpur (+RM4.8 bilion), Sarawak (+RM4.2 bilion), Kedah (+RM1.0 bilion), Negeri Sembilan (+RM772.5 juta), W.P. Labuan (+RM693.0 juta), Sabah (+RM599.5 juta) dan Perlis (+RM42.7 juta). Walau bagaimanapun, eksport menyusut di Perak (-RM568.6 juta), Pahang (-RM408.2 juta), Terengganu (-RM337.8 juta), Melaka (-RM278.6 juta) dan Kelantan (-RM115.8 juta).

Pada masa yang sama, import juga meningkat RM35.0 bilion (+41.9%) berbanding bulan yang sama tahun sebelumnya. Peningkatan import dicatatkan di Selangor (+RM8.5 bilion), W.P. Kuala Lumpur (+RM7.1 bilion), Johor (+RM7.1 bilion), Pulau Pinang (+RM6.1 bilion), Negeri Sembilan (+RM1.6 bilion), Sarawak (+RM1.6 bilion), Kedah (+RM1.5 bilion), Pahang (+RM1.1 bilion), Sabah (+RM224.8 juta), Terengganu (+RM135.7 juta) dan Perlis (+RM49.9 juta). Walau bagaimanapun, import menurun di Perak (-RM632.7 juta), Kelantan (-RM247.9 juta), Melaka (-RM17.9 juta) dan W.P. Labuan (-RM12.3 juta).

Antara lima negeri pengekspor utama, Pulau Pinang kekal sebagai pengekspor utama dengan sumbangan 27.9 peratus, diikuti oleh Johor (23.2%), Selangor (18.0%), Sarawak (8.7%) dan W.P. Kuala Lumpur (5.7%). Sementara itu, bagi import, Selangor menjadi penyumbang utama dengan 25.1 peratus, diikuti oleh Pulau Pinang (21.4%), Johor (20.6%), W.P. Kuala Lumpur (11.0%) dan Kedah (5.1%).